

Programa fascinante Hoben y Talentoso cu exposicion di tres aña di su existencia

ORANJESTAD- Tres aña pasa a start cu e bunita proyecto Hoben y Talentoso inicia pa Prome Minister Mike Eman, unda hobennan cu a destaca riba varios tereno, entre otro deporte, arte, musica, innovacion, empresario, canto, arte di palabra, filmacion y mucho mas ta wordo reconoci pa nan talento y meritonan.

Aruba conoce hopi hoben cu ta traha duro pa bay dilanti, cu ta ehempel y inspiracion pa otro, pa cual motibo nan merece di wordo poni den luz positivo riba e nivel halto aki. Den un bunita ambiente den Cas di Cultura specialmente decora pa e evento aki - na luna di november 2015- e hobennan a haya nan reconocimiento di Prome Minister Eman cu tin un tremendo team su tras cu ta traha duro pa logra un exitoso evento. Mayornan, famia, amistad y conoci nan tabata presente durante e ultimo evento di Hoben y Talentoso. Diaranson anochi a tene riba



dak di edificio di Cocolishi un exposicion di e tres añanan di e programa Hoben y Talentoso unda tur e hobennan cu a haya un reconocimiento di e tres añanan a keda invita pa pasa mira e exposicion. Hopi tabata presente, pero hopi no por tabata presente pa motibo di ta den exterior pa nan estudio. Presidente di e proyecto Maurits Malmberg a habri e evento cu a tuma luga bou un shelo yena cu un bunita luna y hopi strea iluminando e streanan den Cocolishi. Prome Minister Eman a bisa

cu pa e team organizado y e mes tambe ta un gran honor pa por cuminsa aña di un forma positivo asina. "Aki mi ta mira yen di hoben cu ta un inspiracion pa comunidad." Eman a splica cu a start cu e programa aki pasobra cu a constata cu den comunidad tin asina hopi hoben cu riba un cantidad grandi di tereno ta destaca. Tin ta haya e atencion cu nan merece y otro no. Pa esnan cu no ta haya reconocimiento pa nan prestacion e programa ta pone e hobennan aki riba un plataforma pa inspira otro ho-



bennan pa sigui nan ehempel. "E idea di un Expo ta tremendo. Nos a cuminsa prome cu un kalender pa muchanan di scol y awor nos ta saca un buki y tambe potretnan na momento cu nan ta haya nan reconocimiento. Tur esaki por mira den e exposicion." Prome Minister Eman a gradici tur esnan involvi den e proyecto y cu tabata presente. Nan ta Ditto Acosta, Maurits Malmberg, Seever Krozendijk, Anuar Habibe, Noel Werleman, Leo Maduro y e ekipo di departamento di prensa

presente. Eman a remarca cu el a habri aña cu un hoben cu a destaca cantando Dande hunto cun'e pa nos Grandinan, cu ta Jonathan Croes. Despues a sigui apertura di e Expo Hoben y Talentoso. Cada hoben presente di 2015 a haya 5 buki regalo pa nan reparti entre nan hendenan. E anochi na sigui den bon ambiente. E luna y streanan a sigui manda nan rayonnan bunita cu yen di splendor pa mundo y specialmente riba dak di Cocolishi. □